



partii naleraq

UPA 2016/071-01

23.05.2016

Meeqqat peqqissumik imaqarluartumillu inerikkiartornissaannut, atualernissamut piareersimanissaannut nalinginnaasumillu perorsarsimassusaannut iluaqutaasussamik nunatsinni meeqqanut suli atualinngitsunut perorsaanikkut inerikkiartuutaasumik ilaqtariit meerartallit nuna tamakkerlugu atuinissamut piarerrfissaqalernissaat qanoq qulakkeerneqarsinnaanersoq pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq Hans Enoksen, Partii Naleraq)

Inatsisartunut ilaasortaq Hans Enoksen, Partii Naleraq, siunnersuuteqarpoq - meeqqat peqqissumik imaqarluartumillu inerikkiartornissaannut, atualernissamut piareersimanissaannut nalinginnaasumillu perorsarsimassusaannut iluaqutaasussamik nunatsinni meeqqanut suli atualinngitsunut perorsaanikkut inerikkiartuutaasumik ilaqtariit meerartallit nuna tamakkerlugu atuinissamut piarerrfissaqalernissaat qanoq qulakkeerneqarsinnaanersoq pillugu apeqquteqaat aallaavigalugu oqallisissiatut siunnersuutaa Partii Naleqqamiit imannak oqaaseqarfigissuarput.

Nunatsinni meerartatta pitsaasumik atugaqarlutik peroriartorlutillu angerlarsimaffimmini, meeqquerivinni, atuarfinni, allanilu ulluunerani ornittakkani, meeqqat paarineqarnerinut pitsaasumik atugaqartitsinissarput tamatta inuiaqatigiit soqutigisariaqarparput, ilaqtariinnut inuiannullu tamanut meerartaqarnerup nuannersuunissaa suli pitsaanerusunik aqqutissiutissagipput oqallisissiamik siunnersuuteqarnermini, inatsisartunut ilaasortap Hans Enoksenip ilaatigut oqaatigisai tamakkiisumik taperserpavut.

Tassami tamatta nalunngereerparput, ilaqtariippassuit ulluinnarni inuuniarnikkut angummanniapiloortut qanoq amerlatigisut. Ilami pisortatigoortumik paasissutissat naapertorlugit kalaallit nunatsinni inuit minnerpaamik 70 procentii pallillugit aningaasarsiakinnerpaatut akunnattumillu annertussusilinnik isertitaqartartuupput.

Aamma naluneqanngilaq inuppassuit ilaqtariippassuillu inigisaminniit anisitaasartut amerlingaluttuinnartut.

Taamaattumik pingaartumik ilaqutariinnut arlalinnik meerartalinnut atugassarititaasut oqilisarneqartariaqarput, meeqqerivinniititsinernut meeraaqqerivinniititsinernullu akit naleqqussarneqartariaqarput.

Eqqaamaneqartariaqarpormi ilaqutariit akissarsiakinnerit ilungersunartorsioraluaqisut, kisianni suli annerusumik ilungersunartorsiortut aamma tassaammata anaanat ataatallu kisimiittut, ilaqutariillu akunnattumik annertussusilinnik isertitaqartartut, taakkuuppummi amerlanertigut, ineqarnermut, meeqqerivinnut meeraaqqerivinnullu tapiiffigineqarsinnaanngitsut.

Taamaamma siunnersuuteqartuoq ilumoorluinnarpoq oqarami, ilaqutariippasuit meerartallit inuuniarnikkut atukkamikkut ilungersunartorujussuarmik inissisimapput.

Tassami ineqarnermut akit qaffasissorujussuupput, taamaammat-una aamma Partii Naleqqamiit upernaq manna ataatsimiinitsinni ilaqutariit pissakinnerusut akunnattumillu akissarsiallit namminerisaminnik illutaasinnaanerat initaasinnaanerallu anguniarlugu aaliangiiffigisassatut siunnersuuteqartugut, qujanartumik partiinit amerlanerussuteqarluartunik taparserneqartumik.

Isumaqarpugut kommuunit Namminersorlutillu oqartussat qanimut suleqatigiillutik ilaqutariinnut meerartalinnut meeqqerivinniititsinernut meeraaqqerivinniititsinernullu akit apparsarneqarnissaat aqputtissiatariaqaraat.

Siunnersuut manna oqallisissianngortipparput, naak nalunnigikkaluarlugu ulluinnarni meeqqeriveqarnernut meeraaqqeriveqarnernullu tunngasut kommuninit isumagineqartartut, kisianni taamaakkaluartoq takusinnaavarput ajornartorsiutit qulaani oqaatigisavut aamma ataasiaannarata maani eqqartortakkavut, kommunit kisimiillutik aqqiivigisinnaanngikkaat.

Tupinnaqaarlu Naalakkersuisut-aasiit akissuteqarnerminni, akisussaaffik oqartussaaffillu kommuninut innersuussutigiinnarmassuk, naak namminneq aamma nalunnigereertussaangaluarlugu ullumikkut kommunit ilai aningaasatigut arlippassuartigullu qanoq ajornartorsiuteqartigereersut.

Aammami Meeqqat suli atualinngitsut perorsaanikkut inerikkiartuutaasumik ulluunerani neqeroorutit pillugit inatsisartut inatsisaat nr. 16, 3. december 2012-imeersup § 4-aa naapertorlugu Naalakkersuisut qullersaasutut meeqqat siunnersuummi eqqartorneqartut pillugit Naalakkersuisut akisussaaffeqareerlutillu nakkutilliinissamik pisussaaffeqareerput, taamaattumik suna tamaat kommuninut “miloriutiinnarneqarsinnaanngilaq”.

Tassami ukioq manna meeqqat ukiuattut taallugu Naalakkersuisut siulittaasuata suaarutigereernikuuaa, kisianni ajoraluartumik meeqqat ilarpassinut atugassarititaasut

uggornaraluartumik naalakkersuisuniit tamakkiisumik paasineqarsimanngikkunik, annerusumik iliuuseqarfiginiarneqanngitsut takusinnaavarput.

Tassami assersuutigalugu maani inimi isumaginninnermut naalakkersuisup pingasunngornikkut apeqquteqarfigineqarneranut atatillugu, taamani paasitinneqarpugut, meeqqat ukiuannut atatillugu kommunit suliniutinut assigiinngitsunut katillugit 7 mio. kr-it missaannik qinnuteqarsimasut.

Taakkunungalu Naalakkersuisut taamaallaat 1 mio. kr-it aningaasaqarnermut ataatsimiititaliamut qinnuteqaatigineqarsimasut. Taamaammat aperisariaqarpugut, naak meeqqat ukiuannut atatillugu naalakkersuisut pimoorussinerat ?

Naalakkersuisut uunga siunnersuummut akissuteqarnerminni ilaatigut ima allapput:

“Innuttaasut isumaqarunik, kommuninit suliassat naammaginartumik naammassineqartanngitsut, innuttaasut ataasiakkaat periarfissaqarpugut atualinnginnermi inuinnartut suliniutinik aallartitsinissamat. Nalunaarutigineqarsinnaavoq, Nuummi ulluunerani paaqqinnittarfiit inuinnarnik pilersinneqarsimasut marluummata”.

Oqaaseq sakkortungaluarpalluunniit oqartariaqarpugut, naalakkersuisut taama akisinnaanerat kanngunaqaaq, inunnullu angummanniapilooertunut mitallernertut allaat taaneqartariaqarsorinarluni.

Tassami Nuummi pissutsit periarfissallu sinerissap sinneranut naleqqersuunneqarsinnaanngilluinnarput, pingaartumik nunaqarfinni aamma meeqqeriveqarnikkut periarfissaqanngitsut eqqarsaatigalugit.

Sinerissamiillu assersuuteqassangutta, ippassaaniinnannguaq tusarparput Kullersuarmi meeqqanut inuusuttunullu sammisassaqartitsivituq, tassali ajungaarmat kommunimiit matuneqarsimasoq. Naak sumiiffinni taamaattuni periarfissat Naalakkersuisut takorluungaat ?

Inatsisartut oqaaseqaatissaattut siunnersuummut imatut allannguutissamik siunnersuuteqarpgut:

“Ilaqutariit meerartallit isertitakitsut **akunnattunillu isertitaqartartut** meeqqanut suli atualinngitsunut perorsanikkut inerikkiartuutaasumik neqeroorutinik atuinissaannik peqataanissaannillu periarfissaqarnerulernissaannik annertunerusumik qulakkeerinninnissamik sulissuteqarnissat Inatsisartut Naalakkersuisunut kaammattuutigaat, **taakkununnga ilanngullugit meeqqerivinni meeraaqqerivinni, ineqarnermullu akit apparsarneqarnissat**”.

Taama oqaaseqarluta siunnersuut taperserparput.

